

Christian Meivah

January - February, 2014

Lhani seh thuso

Private Circulation

2014 ichepi diu dan

Kum 2013 akichai tan, tun kumthah toh ikilhon diu ahitai. Iti na kigot em ? 2014 in hoilam nalhut ding nahet em ? Mol-a nakal mai thei, phaichama lam najot mai thei, ahiloule neldi ham bon-lhoh ham lah a lam nahin jot mai thei ahi. Nakison hinam ? Mi koima achanga phathei vang aumpoi. Panpi ngaicha ngen akihi.

Ikhonung ding thu akihepon ahinla Jesu toh kikalhonle vang ima olmona ding umponte. Lk.2:41-52 ah, Joseph le Mary chu Jerusalem a Kalchuh Kut aman jouvun, a-in lama ahung kile lhone. Nikhat lampi ajot jou lhonin Jesu aholmo lhon tai. Jesu toh kilhon ahi lhonnai, tia ana gel lhon vangin adih tapoi. Hiche banga hi eihon jong 2014 kuma hi Jesu toh kakilhon nai tia igel vang uva Jesu anapang lou maithei ahi. Ichih thei-u angai-e. Jesu apan lou leh ikisuh dongjing diu ahi. Amatoh ikilhon jingu leh aman ilampiu asem jing ding ahi. Lhaso poute, i-Pakai u Jesu Christa, ajeh chu ama ilam piu ahi (John 14:6).

Ihin pet-a Jesu toh kilhon hi ithi jouva Pathen kom lhunna ahi, ti

suhmil lou ding ahi. Mose khang masang chun mihem hinkho kum 300 chunglam anahin, Mose khanga konin mihem hinkho hi kum 70-80 sung bou ahung hitai (Ps. 90:9-10). Imanthai louna dia Jesu toh kilhon ngai ahi (Eccles. 3, Job 14:5). Dam thei pet, hat pet, bol thei pet-a ibol ding ibol loule khonunga kisih ima phachom lou ahi.

Pathenin hinkho ichan eipeh em akihepoi. Hinkho chomcha bou inei-u ahi. Hiche kah-a Pathen lung lhaina hinkho man hi angai lhez-e. Bible in mihem hinkho hi hoilai ham khat-a kholjin tobang danin ase in, ahung kondohna muna lhung kit thei din ase-e (1 Pet. 2:11). Mihem hinkho hi janmang tobang in jong ase in, ipi akito ding kihe lou ahi (Ps. 73:20). Mihem hinkho hi nisa lima ile kimu bangin jong ase in, ile chu ki tol lelea, hetman lou kah-a hoilai ham khat geiji, ana teh ji, ana thiji toh atekah-e (Eccles. 6:12).

Mihem hinkho hi twimei chule meikhu tobang, chomkhat ki mua mangkei kit, ageina lam kihelou tobang (Jacob 4:14), ahiloule bela twi tolla akisun lhah le mangdel, nung khop kit theilou tobang ahi (2 Sam.

14:14, tobang ahi. Job 14:1-2 ahin mihem hinkho hi, pahcha tobangjing kala hoikeicha pah-a, nilhah teng le mol-a, pullha tojong atekah-e. Hijeh chun nahinkhoa Pathen lung to kitoh lou, khel dia pha, aumle phat nanei sunga nakhela pha ahi. Nakhel man lou leh mivangse nahi ding ahi. Jesu hi tahsan keo hilouva anei-a neitho phat ahitai. Tulai nikho aphaltlou jeh a phat kijen petcha hi lhaso lou ding ahi (Eph.5:16). Pakai Nikho hung lhung vah ding ahitai, nakhongai leh nalaplel ding ahitai (Obadia 1:15). Tukum 2014 sungin lhezna ijat toh jongleu hen, Pathen lhaso pouhite.

Van gama lutteina ding

Pathen tahsan christian jou se van gama alut nome. Van gam hi lhagao gam, Pathen gam chu ahi. Mi koi hijongle Pathenin asuthheng ho bou lut ding ahiuve. Suhtheng hinom jouse din Jesu tahsan angai-e. Jesua umlou chu Pathena ahipoi (John 14:6). Van gam lutna dia Jesun bol in atiho chu :

1) *Penthah* : John 3:3, mi hi apen thah (apen kit) loule Pathen gama alhung joupoi. Twi-a le Lhagao-a peng lou chu, Pathen gama lut lou ahi (John 3:5). Hia Penthah kiti hi, lhagao hinkhoa penkitna chu ahi (2 Tim.3:16-17, 2 Pet. 1:20-21). Hia lhagao-a penkit kiti hi, Jesu thusei tahsana, chonsetna kisih-a, Pathen lama mai ngat, Pathen lungde bol chu ahi. Jesu tahsana Pathen dia um chahkkeh ho chu van gam lhung dia

2

kinem tah-a hinkho mang dingho ahi tauve (Acts 2:38, Gal.3:27). Ama tohtheina boltheina jala koima mi theng midih soh-a, Pathen gam lut thei ding ahipoi. Pathen gam chu ei ma lamdoh jou ahipoi. Aneipa lung lhaisah vanga kilut thei ahi (Eph. 2:8-9).

2) *Pengthahsa hon chonset abol kit lou diu ahi* : Atheng louleh akisu theng lou ho van gama lut lou ding ahi (1 Cor.6:9-10). Satan dei lampi chu juilou ding ahi (Gal.5:19-21). Apengthah sahon, Gal. Bible chang hoa kisunho hi abol lou diu angai-e. Pakai Jesu thisanin asop thengsa ho chu, thil dihlu le chonset a alut kit diu phal ahipoi (1 Pet. 1:18-19).

3) *Chapang neoho* banga, nun nem, lungse pulou, lungtheng teho chu van gam lut dia kinep ngai ahi : Mt.18:3. Chapang ho lungsunga mi vetdana, mi ginmona, lungdih lou gelna lungthim akonpoi. Milungtheng ho anunnom ahiuve, van gam lut diu ahi (Mt.5:8) tin Bible in ase-e.

4) *Akhut-a laangkon* tuhtaa, kinung hei nalai mi chu van gama lut ding chi ahipoi (Lk.9:62). Twi le Lhagao-a pengthah Pathen insung mi hisa, Jesu houbung mi hisa, hi jongle hiche leiset muthim lah-a ahin laisea lhezna tintang ato nahlai ding ahin, lunglim gehcha le chingthei tah a hinkho aman ngai ahi. Lhezna leh lunglhah na atoteng, ahinkho lui-a kilekit nom aume. Hiteng chule Jesu vet a, tahsan aphai (Heb.12:1-3).

5) *Pakai, Pakai tia eikou jouse* van gam lut ding ahipoi, kapa lung dei bol ho bou chu van gama lut ding ahi, tin Jesun ana sei-e (Mt.7:21). Hiche Pathen lungdei tichu Pathen lung lama hinkho mang kiti hi ipi ahi hoi-a konin kiholdoh intem ! Abon chan Bible a aume, lugkham hih in. Bible simin. Pathen lungdei lama Pathen hou ngai ahi. Pathenin eihoa kona adei leh eihon ibol diuva lom ho jouse Bible a kisunsa ahi. Pathen alungthim pelou-a, akam leh alei-a Pathen vahchoi ho chu, mohseh-a Pathen houho ahiuve (Mt. 15:8-9).

Pathenin ama tahsante dia akoi mun chu Pathen gam ahi. Lut dia kigosa ho hikom chu lhungtei diu ahi. Van gama lut lou jouse Damun a lut diu ahi. Hoijoh chu nakigon em nangma kigelin !

Kho umdol kikhel dan

Tulai miching mithem hon alung jin piu hi, vannoi kho umdan kikhel (climate change) leh leiset pumpi alum cheh cheh (global warming) pa hi ahi. Twilet, huipi nun, natna jatchom chom, lingpi kiho, go juh dan kikhel hohin mihemte asuboi tai. Pathenin twi leh gammang lhing kei-in iphatna diuvin akoi-e. Van thamjol hi atho-tho (layers) a um ahin, hia chun “Green House Gas Emission” kiti jong aumin, hiche jeh a hi eihon gojuh nisat dan kitupjep ainei-u ahin, tulai hin GHGE jong hi aki suse tan, hijeh chun gojuh ni

sat dan jong akitup jou tapoi. Hiche hi mihem hon thing ho, gammang ho, twi veina ho, asuhmang jeh-u ahi pene. Gen. 2 a Pathenin Adam chu hon vetup din angansei. Gen. 3, neh phallou Adam le Eve in, aneh jeh-a leiset gaosap achantha thu aume. Leiset ahina ding bang ahi tapoi. Thilsem jousen tuhin, Pathen chate akineppi tauve (Rom.8:19).

Jesu panna jala ima jouse um ahi, tin John 1:3 in ase in, Pathen in mihem angailut jeh-a Jesu ahinsol peh-u John 3:16 a aume. Pathenin Adam chu Eden hon vetup dia angan se banga eihon jong Pathen thilsem ho ivettup-u ngai ahi (Gen.2:15). Tu lai hin mihemte hi Pathen thilsem su tup sanga, suse joh akihi tai. Thing lhang mihon louvat aboluvin, thing asumangin, phaitol mihon khopi akeh len uvin, twi veina hampa kena, thingphung umna ho asumange. Hi cheho hin leiset alumsah cheh ahi.

Gari lhaiho meikhu, thil ki semna ho (factory) meikhu, twi lah a kisunglha thao phalou ho, hin mi hem tahsah atongkhan dammo vei setna jatchom chom akinei-e. Go juh meikai dan akikhel jeh in, loule hon bol ho thilsoh alhom tai. Gam mang thingphung ho akem tah jeh in go alhom juh in, chule oxygen jong alhomin, tahsaan adammo lotai. Kho pia cheng hon leinoi twi ajop doh uva aman phat un, leiset sunga twi vei jong akhenem gamin, twisam put ho jong akang gam tai.

Twikhanglen panga cheng a ngaman miho jong kahvah vah in huisen anojal jiuvin, athi amang atam lneh in, agenthei tauve. Mol sang hoa buhbang ho jong vannoi asat cheh cheh jeh in, ajun lhauvin twikhang len twi jong akhang cheh in ahitai. Ipi chu hita jongle eiho christian te vang Pathena ikingai diu ahi. Kithi hen kihing leh Pathen cha akihi poule vannoi hui le go ijat in kisuh khel-hen, kitou khel jongle lungdon na ding behseh umlou ahi.

Pathen aumnai, aman ima jouse eibol peh-a, kakhankho diu agel ahi, tia Pathen chung kingap ngai ahi. Hiche chung chona kho umdol akitup jepna dia pan lah ngai ahi. Thing hatu ding, Electric lhoman ding, twi kitup-a man ding, in vel suhtheng jing ding, meikhu suh lhoma, Christian Environmental Ethics, hi chapang ho leh houbung mite hetsah ding, “ECO Sunday” (June 1st. sunday) jong man ding tiho hi khoh sah din apha. Apha lam khohsah mihem hiute.

(Rev. J. Mang Doungel, WVI)

Mesopotamia tua hoilai ?

- Tua Iraq itiu hi Mesopotamia ana kiti ... Eden Hon chu Iraq a ana ume ... Noah in Iraq a kong anasem ahi ... Babel insang chu Iraq sung ahi ... Abraham chu Ur a kon ahi, tun Southern Iraq ahi ... Isaac jinu Rebecca chu Nahor a kon ahin, Iraq sung ahi ... Jacob in Rachel

akimupina chu Iraq ahi ... Jonah in Nineveh a thu anasei in, hichu Iraq sung ahi ... Assyria hi Iraq sung ahin, amahon Israel phung som chu ana jouvui ... Amos kholhang sapna mun chu Iraq sung ahi ... Jerusalem susea Babylon hi Iraq sunga um ahi ... Keipi bankai hon lah-a Daniel kiselutna mun chu Iraq sung ahi ... Daniel lekhabua meikou lhun sunga Hebrew mi thum kiselutna leh leng pan meikou lah-a mi li joh amuna chu Iraq gamsung ahin, mi alina chu Jesu ahi.

Babylon leng Belshazzar in baanga lekha kisun amuna chu Iraq sung ahi ... Babylon a leng-pa Nebuchadnezzar, in Judah miho ana matlahna chu Iraq ahi ... Ezekiel in Iraq a Pathen thu anasei-e ... Jesu pen-a solam miching hung ho chu Iraq a kon ahiuve ... Peter in Pathen thu ana seinu chu Iraq sung ahi ... Mesopotamia hi vadung ni kikh kitina ahin, hichu Euphratis leh Tigris ahi ... Iraq hi gam abul det (deep roots) kitina ahi. Ahimongin jong Iraq hi Bible a gam thupi khat ahi.

Dumchep (Jachep), Tuibuh

Churup (Dumchep) khum chungu, “Cigarette smoking is injurious to health” tin akisune. Jachep hi tahsa damtheina suse ahi, tia kisun ahin mihem tahsa susethei ahi, ati ahipoi. Hitia akisut vangin, lekha themho dumchep, jachep bol aume. Tuibuh kiti leh tuibuh tui mom jong

tahsa damtheina suse ahithouve. Mi abangin damtheina lamin agelin ahi. Bible in avet vanga mulou, ajah nah a jalou atiho hi amaho hi hinte. Hi ho chep, mom, neh-a kona hi nat jatchom chom itahsa sunga kikou lut jia ahi. Amaho chu, heart trouble, lung cancer, infizema, breathing problem, ho ahive. Hiche ho chep le don, neh jeh-a khonunga nadam moa ahile nangma nakingoh angai tai, midang ngoh ngailou ahi.

Nelhat khat touvin, Bible a bon kisun lou ati maithei ahi. Judu pasal nin, ju adonkhom seh lhonin, “Christa’n michonse alai” ti la khu asaji lhonin, olmo louvin adon don lhone, tin akijai. Jesu hinlai khanga chu churup chep, dumchep hohi umlou ana hinte, tin Bible them hon asei ui. Gal.5:19-21 a Paul in ana sutnaa hin ahoptha thouve. Bible in toltha, leh mi ama kithat apha poi (Rom.13:9). Mitha kiti apha poi. Dum mom, dum chep, jachep, tui buh chep le atui mom ho hi, ol-ola ama kithat ahi. Mikhat in michom khat atha Bible in apha lou jeh in, ama le ama kithat jong apha poi.

John in hitobang bol ho hi damun meikou a lut ding, thi nina toh din asei-e (Rev.21:8). Pathen tahsante hi, Paul in, Pathen intheng ahi tin asei-e. Pathen chenna in mei khua, anamsea dimsah aumle ama sunga Pathen cheng ponte, ti akihei (1 Cor.6:19-20). Gan kihing lha banga hin ding ahi (Rom.12:1-2).

Na-inchen nom naam ?

(Billy Graham)

Tulai hin inchen dan akikhel lleh tai. Pathen umlam helou khop a numei pasal chengkhom, kimoh vop vop, adei dei-a chon, tiho aum doh tai. Insung kitomona hi adeh in, sum le pai, kitahsan tolou, chale nao jeh, ijitoh kikhen nomna, natle sat, numeite insung ham pasalte insung hamin akhut aha thollut tiho hi ahi nome. Insung nom, kitihi ahahsa tai. Hou natong ho insung jong achuti nop deh tapoi.

Ahinla a-in sunga Pathen chensah ho invang anom jep tei-e. Pathen panna louva insung nom sem hithei lou ahi. Sumle pai, neile gou in, Pathen panmun akhel thei louhel ahi. Na-inchen nom hen natile na-in chu Pathen chen theina in hisah tei in. Tulai vannoi leiset-a boina, hah satna atamjo insunga kon ahi. Lung thenlouna hi insunga kona kijil jia ahi.

Minu mipan mi ahouset, le asamset teng, achaten hichu athep loi. Anu apan “Pathen loupai hen” tia aseiji achan ajah le aman jong akichin in ajom jie. Nampi khat hi insung bei-in aum theipoi. Kivetda, kimusit, kidou, kitiho insunga kona hung kipan ahi. Pathenin vannoi lei set asem jou jouva insung ana semloi ahi. Society khat hi insunga kona hung kijil ahi. Pathenin, “Mihempa hi achanga ahin ding kisuhponte, akithopi ding khat kasem angai-e” tin ana sei-e.

Hijeh chun numei chu asem jouvin pasalpa chu anapetai. Jineina chung changa mihem jat gup thu ka sei nome. Amasan *khangthahte* : Khangthah hon jinei ding athanop piuve. Inchen thudol chung chang kisutna lekhabu akichoh un asim ji uve. TV a konin jong inchen dan ho aveuvin, chule nupa kikhen thu jong aheuve. Jinei louva akiumleh kikipah jonte, tiho jong agel jiuve. Hijeh hin alungu aboi in, “Hinkho lhum keidia jinei-a, jitoh kikhen louna thei ipi lampi aum dem ? Bible dung jui-a jinei hi itobang chu ham ? Hitia jinei alhou chu iti kanei ding ham ?” tiho a hin aboi tauve.

Aninan, *achanga cheng* : Achanga incheng tamtah aume. Ji nei lou beh a hing, ajitoh kikhen, mei thai ho ahive. Hitobang ho hi hung pung cheh cheh din aume. Achanga achatoh incheng jong apunge. Nungah lekhasim ho atamjo, lekha sim a pham ahiloule jinei doh-a pham, tina hon alungboi tauve. Nungah abang vang jinei louva cha nei-a cha toh kivah-a, hinkho nomtah-a mana koima pasal noi-a kun kun lou ding dei jong aume.

Athumnan, *jitoh kida* : Mi abang ajinei in, ahinla ipi ham khat jeh in ajitoh akikhen loi. Jinei lolhing loute ahive. Mi abang chu nivei, thumvei jineisa jong ahi. Hitia ajinei chu kisihnaa anei jiu ahi. Amaho hin alunguva kichatna aneilouve. Ama hohi iti-ule natim ! Hoilam angat uva

phading hitam ? Jito kida ho hinkho hi thanop umlou tah ahi.

Alina in, *jinei jouva nupa ani nia kisih* : Mi abangin ji anei jouvin, anopna le ahahna, a lung hanna, akisihna, ki-oimona, hahsa thohna ho atoh-e. Ajinei chu pha asa tapouve, ahinla kikhen ding jong ago-pouve. Ahinla jinei lolhinna chu amani nupa koma akilang tapoi. Aki theida lhonin, achom chomin acheng lhone. “Kajineina hi ipi vat ahidem ! Adihlou ipi uma ham ? Ji kineile hi tinte kanatipoi. Hitia jinei ding in ka na kigel poi” tiho asei jiuve.

Anganaa, *nupaa achen khom vanga kilungtoh lou* : Nupa teni chu in khat-a acheng lhonin, a chang changa kiletsah, polam thilsoh hon kikhen sah tei agot, amanin jong akikah lhona adihlou aume ti kihet lhon, ahiala kikabeh thei lhon louhel ahi. Guest House khat-a gehkhom bang jeng lhon ahi. Kum sottah ki chengsa hilhon jogle hitia chu hing maimai lhona, ipi bolla phatea long dela chen ding ham tijong gelpha lhon louhel jong aume. Ikichen lhon hi ide bang lhon ahipoi, ti aheth lhon vanga chengkhom thou thou lhon aume.

Agupnaa, *kipah tah-a in cheng* : Nupa themkhat vang nom tah in a-in chenge. Ipi chun inchen anopsah hintem ! Nupa hou-in khat a kaikhom, hou-in chom chom a member hilou, ahiloule achate plate cha baptise chang, ahiloule Pathen

7
mina thilpeh lama thanom, chule achenkhompi hotoh kitoh, tiho hi ahi jie. Amavang Bible dung jui-a ahiloule Christian jinei, kiti vang hi phat chomkhat dia chenkhom ahi lou le jinei dia kinopto mai-mai chu hilou ahi. Christian jinei kiti hi, kipeh doh chule kiphaldoh tona chu ahi joi. Asumo asaimo um jongle kipeh tei tei ding dol ahi. Hinkho lhum kei a kicheng dia kipehdohna chu ahin, hichu Bible dei jineina chu ahi.

Tulai hin mi abang vang aki chen konle kinoptona lekha akijih khum lhonin, “Ikida tona aumkhah leh nang hiche che, chule kei hiche che kachan ding ahi” ti kinoptona soi abolji lhone. Kiphalto, kipehto kitia vang hichu aumpon, kitahsan tona ahijoi. Iji ima jousea nganse chu Christian jinei kiti hi ahi. Christian jinei dihtah a thil thum aume.

(1) Nupan achang cheh-a Pathen atah sanding, (2) Pathenin amani din thilgon leh hinkho mandan asem pehsa aume, ti atahsan lhon ding, (3) Amani akitahsan to chung chona anupa lhona Pathena kiphah lhon ding ahi. Na inchen naa hahsa nato leh Cross a hungin, Jesu na henga hung hen lang, nangaidam hen chule nahindan nakhel peh hen, na insung chu Pathenin lohen, chuti leh ima jouse pha chamkim tante. Hou-in kainan nate, Baptise chang sa jong hinan nate. Pathena nakipeh loule phachom lou ding ahi. Na Pathen idia nasonlel ham, Jesu jonin !

Hinkho Thah Nadei em ?

Hosea 14:1-9, 2 Cor. 5:16-21, ikhang sungu, ahideh chun eiho christian ihuva pat, kum kiheichin akimang jingin, non-christian hijong le kum kiheichin hi golnop bol nan amangui. Kum kihei-a kumthah hung lhun hi Christiane dia golnop mai mai hilouva, kum le lha, nikho sempa Pathen to kinainaa neidin akitoh-e.

1. Hosea themgao kama Pathenin Israelte akou dan hi, Pathen koma kile kitna dia Pathenin adei chu, “Ka chonset-u ngaidamin” tia tao ding hi ahi. Taona Pathenin asan tengle ngai chat jouse bulhing kei-a apeh ding ahi. Pathenin angaidam kiphon doh na chu, mihem mit vet-a jong deichat le ochat um ding ahi.

2. Solchah Paul kama hinkho thah aseichet dan hi, Paul chule huhhing na thupha dihtah seiho chu kisonpia asei-u jui ding, mihem sei-a gellou chu ahi. Jesu Christa tahsan jala Pathenin Lhagao alung sunga akhum peh ho chu Jesu toh hingkhom, thah beh-a Pathenin asemthah chu ahitai (2 Cor.5:17). Pathen Lhagao-a hing ho chu Pathen to kicham ahi tauvin abol atoh jouseu chu lhacha natoh a Pathenin asimpeh ahitai.

3. Jesu Christa to hingkhom jouse Pathen palai ahitauve. Jesu tahsan jala Lhagao chenkumpi miho chu Pathenin leiset-a palai-a anei-u ahi tai. Pathen dia palaiho chu Pathenin

8
phat seh-a ama thupha sei-a tong doh dia anganse jing ahitai. Pathen palai hon Jesu tahsan christian ho koma Pathen lungdei abolna diuva aseipeh jingu ahi. Jesu to kijop-a hinkho thah-a hinnaa chu ilung sung uva pansa Lhagao Theng lamkai-a Pathen dei iholuva ibol doh diu angai tai.

(Dr. T. Lunkim)

Namit dam nam ?

Mihem dia mit hi thilkhoh tah khat ahi. Mit-a ima khat alut leh moh noi noilou ding, imit agot jeh-a akiha theilou tengle noi sanga twi theng lutsah-a mit suhtheng apha. Lekha sim jeh-a ahiloule computer sottah vet jeh-a mit-ha anop louleh chom khat mit sinji, chule twitheng thelut (lutsah) ding, mit lhouna ahi.

Anche louhing haneh, nga chuleh vitamin A, panna theiho neh jing mit dia damna ahi. Mit a mitbeh kibeh hi, mit-a contact lense man sanga phajo ahi. Ajeh chu Lense aki man leh lahdohle suhtheng jing angai jeh in, ikhut athenlou pet, khuttin ki kah-a athenglou aumpet ahikhah le mit-a bacteria alut jin, mit adammo sah jie. Mit hi phatea depthem ngai ahi.

Eden Thah kisem

Eden lui-a mimasa Adam te nupa satan lhez lhah-a aum jeh in, Pathenin agaosap in thina le lhan khuh thaneina asohtan, nat thohgim na le kana lhisona gam ahidoh tai.

Pathenin Eden chulsa pah sah kit ding le semdoh kit dingin chu le thina le lhankhuh thaneina jouse sumanga chonsetna gal jousoh ding in, achapa Jesu eihin solpeh tauvin ahi. Hallelujah, hallelujah ! Ajeh chu Pathenin hibanga hi mihem angailut ahin, ama tahsan chan chu mangthah lou-a tonsot hinkemlou anei theina diuva achapa chang-khat bou chu apeh ahitai (Jn. 3:16).

Pakai Jesu tahsan jouse chu aman eilhatdam tah jeh un, mithah chu ihi tauve. Thikit louna hinkho inei tauve. Aloupi in akidange. Pathen thangvah in um hen ! Mithah ihitah jeh un, leiset chu leiset-a kile kit ta lou ding, leivui chu leivui sohkit talou ding, monthei chu monthei lou-a kai thou hita ding, thithei chu thithei lou a kaithou hita ding ahi. Adam a chu thina uma anahin, Christa a vang hinna le thokitna aume.

Jesu tahsan teho Eden thah a uma ahitan, Pathen lim le mel pu, ama tobanga asemu ahitan Jesun eipeh-u hinna hi aloupi lhez in, sei chim thei ahipoi. Gan-hing ho vang athi nia kichai, Lhagao bei thisana hing mai-mai ahi. Mihemte hi Pathen hinna hu, ama Lhagao nei ihuvin, chingthei tah-a hinna, satan kilhep lhah sah lou ding ahi. Christa to hing khom ho vang, tonsot hinkemlou chang untin, Pathen toh chengkhom tauvinte. Satan toh chengkhom vang chu, tonsot thina chang ding, Damun alo diu ahi.

(Rev. Seikholen)

Ka-janmang (Dream)

(Maryland, USA a Pathen tah san behlou khangdong, Joshua Harris in jan khat mang (dream) kidang tah ananei in, hiche nia kon chun Jesu pha ten ahin tahsan tai. Amang hiti ahi.)

Ajanmang in indan sung khat-a ana umin, hikoma chun lekha pheng tampi akisethom jengin ahi. Pheng khat chu avet leh, “Kadei nungah ho” tin akisunin, alah doh-a asimpat leh ajah achan anung koi tai. Hia chun, aman ahel nu-ngah ho asim doh-e. Aban lekha khat avet le atoh le abol alen le aneo ho kim kei-in, asuhmil tah vangin akisun cheh-e. Akicha tan, akisih tan, amei doi tai. Mi khat touvin, hiche lekha ho chu asim em tia avet leh koima vang amupoi.

Lekha pheng khat chu avet leh “Kajou lhez kaloite ho” tin aki sune. Hia chun aloi le agol, ajouva alhez sese thusim akisune. “Kasim lekhabu ho” “Jou kasei ho” “Mi ka panpi louho” “Totna thu kasei ho” “Kakinah piho” “Ka-inkote toh ka boina ho” “Kangeinom la chavei ho” tiho tampi ana simdoh-e. “Ka chonsetna ho” kiti lekha chu themcha khat asimin, ajahchan aban asimjom tapoi. Midang in asimdoh ding aja chatpi manin, lekha ho chu baan bokeh agot leh thih bangin atah in ajou tapoi. Lungdong tah-a amai baanga angap pet chun, “Pathen thu kasei leh ho” kiti lekha chu agalmu

tan, hiche lekha pheng chu avahset in, a-emsel jengin ahi. Hia chun thu themcha bou akisune. Pathen thu ana tamsei doh lou jeh chun akisih in akaptai. Lekha pheng chung ahi longlut chu akhut-a aphet ngima ahi leh Jesu lim joh amudoh tan ahi. Alungah Jesu lim hida leh ati vang in amu tei jenge. Jesu mai avet leh amol theh in, apona lhez in, Joshua poh natna sangin Jesu poh nat johna amui.

Chuin Joshua akap in ahile Jesu chu ahenga ahungin akoi-in chule Jesu jong amatoh akap bom tan anahi. Chuin lekha pheng ho chu aban banin alan, ama joh Joshua hidanin, keibol ahi ti hetsah nan, lou san-in soi anabol in ahitai. Joshua in “Vo Jesu nangbol ahipoi, keibol joh kisun ahi, soi bol hih in” ati vangin Jesun lekha pheng jouse chung aamin akisut cheh tan ahi. Joshua in anailut-a avet leh Jesun athisana soi abol anahi.

Abonchaa soi aboljouvin, Jesu chu Joshua koma ahungin, akhut Joshua lengkou-a angamin, “Ijakai abulhing tai” “Akichai tai” (Jn.19:30), tin ana sei-e. Chuin Joshua ading doh in ahile Jesun kot ahon leh in, asoldoh tai. Hijou chun Joshua akhangin, tun Jesu tahsan tah khat ahitai (Rev. 20:12). Ama mang hi akivet leh Pathenin mi jouse thusim anei-e tihi ahi. Kisem thah a Jesu belte mi vangpha ahi. Pakai Jesun ilampiu isem phatpeh nom jing in ahi (1 Jn. 1:19, Ps. 51).

Nui-ji-ji Damna

* *Adamloupa* : Doctor, kanakol alang nin mei-in eikah leh in, lou neipen.

Doctor : Iti akah ham ?

Damloupa : Ka sangkhol istri (iron) kabol pet-a, kaloipan phone ahin bol a, istri chu phone kahi sah-a kadop-a kakol toh kasuhto leh ei kah ahi.

Doctor : Ahile, nakol langkhat chu iti akah ham ?

Damloupa : Kavon chu istri kabol kit leh phone ahinol kit in, istri chu kakol langkhat-a kaga suhto kitle hijong chu akah ahitai, ati.

* *Damun* a umpa khat in satan kom a, kajinu phone kabol nome, atile satan chun abolsah tai. Akihou pet lhonin, ajinun houve tia ahin houset chu, avela hon ajauve. Phone abol jou phat chun, satan henga, “Sum ija sohtam ?” tia anadoh leh satan in, “Ima napeh angaipoi. Hell to hell, free of cost” ahi, anati.

* *Ha (teeth)* in lei henga, “Kapea nahile nathi pot ding ahi” atile lei in, “Khohlou, ken thu changkhat koi ham khat koma kasei khela ahile nangho 32 ho chu aman nakhet lhah jeng diu ahi” anati.

* *Thoukang ni kihouna* : Khat pan, “Golpa, tulai hin mihem thi chop ding jong, thina thei ahitan, ki chop dalela kithi ding ahin, ipia ihin ding hitam ?” atile aloipan, “Nathu

sei chu kahe thempoi. Mihem thi chop vanga iti kithi ding ham, kihing joa hilou ham ?”

Amasapan : “Golpa, kichih thei in. HIV ahiloule AIDS nei thisan na kichop khah ngei ngei leh nathi lo ding ahi” atipeh in ahi.

* *Pasal lhohpha* khat Hotel a alut in, ahsa apuma kikang gop athum leh ahin luipheh tauve. Kipah tah a nehpat agot pet hin, Hotel chapang khat in ahin nailut in, “Hepu, vetan khulama Police pa khu hiche hotel a hung jing ahin, aman ahsa kikeng gop anehji ahin, nang kapeh hibou aumtah jeh in, nanga hi ama penge. Nang in adang naneh nom khat thum in nahin penge” atile pasarpa chu anom poi.

Hotel chapangpa chu police pa henga achen aga sei leh police pa chu hichepa touna koma atou tan, “Hichu kei ahsa ahi. Nangin hi che ahcha nabolna bang banga nang jong kabol ding nahi. Akeng khat nabo doh-a naneh leh nang keng khat kabodoh ding, alha khat nabo doh-a naneh tengle nakhut khat ka bodoh ding ahi, kihet in” ati ahile pasarpa hin olmo louvin, ahkeng khat chu alan alei-in aleh lele jengin, ama keng khat adom sangin, “Nasei bang chun hinbol temin !” tin ana sei-e.

* *Jipa* khat in tehsepu henga, “Kaji nei tillai chun, office a kona in kahung teng, kajinun kengkoh eihin choipeh in, ka uichan eihin hap in, ahi. Tun kajinei jou kum som ahitan, office a

kona in kahung le, ka uichan kakeng koh ahin choi in, kajinun kholhang eisap khum jinge” anati. Tehsepun “Ipi chu nalung khampi ham, namu dia lomho amasaa banga namu nah lai ahin, ima sei datan” tin ana don but-e.

Het-a Phachom Ho

* Guwahati khopi dia in asang pen dan 20 saang khat Borsojai muna sah doh lolina ding thilgon aume. Hiche khopia asaangpen hiding ahi. Tuni gei hin dan som gei bou aume.

* Pathen thu sappao-a, TV a ngai nom hon, hia veuvin :

- Z Cafe, Zee Cafe : Mon-Friday
7 a.m.

- Zee Tv : Mon-Fri, 7:30 a.m.
Sunday, 6 a.m.

* Tamil Nadu a Velankanni muna hou-in thah khat akisa chai in, mi 10,000 asunga touthei chule asung le apoa mi 40,000 kitin thei ahi. Hou in asandan hi ft. 40 ahin, a tower hi ft. 150 asange.

* Vannoi leiset a chapang million 2 vel diarrhoea leh pneumonia in kum seh in athi. Ima aneh konin, chapang hon akhut-u savonin kisil ngimset jiule mi hijat thiponte, atiuve.

* India ten Nov. 4, 2013 nia Mars velkol dia asolu satellite Mangalyaan chu Andhra Pradesh a Sriharikota a kona kikap doh ahin, hiche Mars Orbiter Mission (MOM) hi sum alhomna thei chana ana semu ahi.

Japan ten 2005 chun ana kapdoh un, chule China ten 2011 chun ana kapdoh un, ahinla akisuh pon anahi.

* Roman Catholic father khat hi church compound a aina nilhah-a ahung kile leh gate keeper pan athil adoppeh in, a room a ana pui-e. Room alhun lhonin, ama chuleh mi chom nin father pa chu khaovin akan chom un, sum lakh khat val leh a mobile alah peh un, adalhah konun father pa keng atuh un, jabolna apeu vin, chuin father pa Two Wheeler chun ajam mang tauve.

* Tulai-a natoh ding hol hon, nang ma Face-book, chule E-mail ho pha tea nasuh thengu angai tai. Natoh khat muna dia lekha nase tengule amahon guhthima na Facebook ho asimuva, itobang mi nahi ahedoh jiu ahitai. Application leh bio-data hoa nasut sanguva E-mail leh Facebook hoa nasut hou chu aha vet joh-u ahitai.

* Tulai hin simdia pha course athah thah aume. M.A. in Criminology hi sima pha ahi, lo kum khat-a lakh 6 cheng ahi. University of Madras, Chennai a ahiloule Criminology and Forensic Science Dept., Karnataka University, Dharwad, ahiloule Dept. of Criminology and Forensic Science, Dr. Harisingh Gour University, Sagar, Madhya Pradesh a simthei ahi.

* Athen teng voma, aboh teng kaang ipi ham ?

- *Donbutna* : Black Board ahi.

Christian Meivah - sim ho taona akiman peh jinge. Kum 2013 a kona sumto Rs. 100/- ahitan, asim nom jousen hin peuvin, sum napeh lhaa kona kum nakisim peh ding ahi. M.O. hinthot hon Editor kipe ding lekha beh a namin le address suntei un. Editor pu Mobile No. 94355-51080. Manipur le Naga land a sumto pehna thei ho :-

- 1) Mrs. Neijathem Haokip, Haokip Veng
- 2) Ms. Lhingjanem Haokip, KBC
- 3) Mr. Douzahen Guite, Dewlah Land
- 4) Mr. J. Manchong (Lunpu), KCC
- 5) Rev. Lhoukholal, Kangpokpi Missn
- 6) Mrs. Veikholam, Ideal school, cipur.
- 7) Rev. Seikholen, Medziphema, Nagld.
- 8) Mr. Seikholun Singsit, Kohima.

Nov. 2013 a konin Editor pu Address akikhel tai. Jet lama kisun address hi phaten vetauvin.

Hetsah nom ho

* 2014 kuma Palm Sunday, April 13, Good Friday, April 18, chule Pentecost Sunday, June 8, Mothers Day - May 11 chule Fathers Day - June 15, ahi.

2015 kuma Palm Sunday, March 29, Good Friday, April 3, Pentecost Sunday, May 24 ahi.

* Mingol in achaina lama atoh ho chu miching in akipatna lama atong jitai ... Lekha sima napottho masat loule, lekha jih in pangthei pon nate ... Pathenin lei-a boina abon cha sumang din einganse pouve. Boina semlou din eitem jouve.

Christian Meivah
January - February, 2014

PRINTED MATTER

To :

Editor :
Rev. M. Haokhothong,
C/o, Tingjanem, Headmistress
Nichols High School, Sairbari, K.C. Road,
P.O. Rehabori-781008, Guwahati, Assam.